

全上古三代秦漢三國六朝文

全梁文卷五十五

烏程嚴可均校輯

鍾岵

岵字長岳

一作長丘

潁川長社人晉侍中雅七世孫爲府參軍有良

吏傳十卷

食生物議

鮑之就脯驟於屈伸蟹之將糖躁擾彌甚仁人用意深懷如恒至

於車螯蚶蠓眉目內闕慙渾沌之奇曠殼外緘非金人之慎不悴

不榮曾草木之不若無馨無臭與瓦礫其何算故宜長充庖廚永

爲口實

南齊傳周顒書

鍾嶸

嶸字仲偉岵弟齊永明中爲國子生舉秀才除王國侍郎遷撫

軍行參軍出爲安國令永元末除司徒行參軍入梁爲中軍臨

全梁文卷五十五

全唐金明

川王行參軍、衡陽王宣朔記室、選西中郎晉安王記室

上齊明帝書諫親細務

古者明君揆才、頒政量能、授職三公、坐而論道、九卿作而成務、天

子可恭己南面而已

南史七十
二鍾磔傳

上言軍官

永元肇亂、坐弄天爵、勳非卽戎、官以賄就、揮一金而取九列、寄片
札以招六校、騎都塞市、郎將填街、服旣纓組、尙爲臧獲之事、職雖
黃散、猶躬胥徒之役、名實淆紊、茲焉莫甚、臣愚謂永元諸軍官、是
素族士人、自有清貫、而因斯受爵、一宜削除、以懲僥競、若吏姓寒
人、聽極其門品、不當因軍遂濫清級、若僞雜儉楚、應在緩撫、正宜
嚴斷祿力、直乞虛號而已、謹竭愚忠、不恤罪口、
梁書鍾磔傳又南
史鍾磔傳少末二
句

詩品序

氣之動物物之感人故搖蕩性情形諸舞詠欲以照燭三才輝麗萬有靈祇待之以致饗幽微藉之以昭告動天地感鬼神其近於詩昔南風之辭卿雲之頌厥義負矣夏歌曰鬱陶乎予心楚謠云名余曰正則雖詩體未全然略是五言之濫觴也逮漢李陵始著五言之目古詩眇邈人代難詳推其文體固是炎漢之制非衰周之唱也自王楊枚馬之徒辭賦兢爽而吟詠靡聞從李都尉託班婕妤將百年間有婦人焉一人而已詩人之風頓已缺喪東京二百載中惟有班固詠史質木無文致降及建安曹公父子篤好斯文平原兄弟鬱爲文棟劉楨王粲爲其羽翼次有攀龍託鳳自致於屬車者蓋將百計彬彬之盛大備於時矣爾後陵遲衰微訖於有晉太康中三張二陸兩潘一左勃爾復興踵武前王風流未沫亦文章之中興也永嘉時貴黃老尚虛談於時篇什理過其辭淡乎寡味爰及江表微波尚傳孫綽許詢桓庾諸公皆平典似道德

論建安之風盡矣。先是郭景純用俊上之才，創變其體，劉越石仗清剛之氣，贊成厥美。然彼眾我寡，未能動俗。逮義熙中，謝益壽斐然繼作。元嘉初，有謝靈運才高辭盛，富豔難蹤，固已含跨劉郭，凌轅潘左。故知陳思爲建安之傑，公幹仲宣爲輔，陸機爲太康之英，安仁景陽爲輔，謝客爲元嘉之雄，顏延年爲輔。此皆五言之冠冕，文辭之命世。夫四言文約意廣，取效風騷，便可多得。每苦文煩而意少，故世罕習焉。五言居文辭之要，是眾作之有滋味者也。故云會於流俗，豈不以指事遺形，窮情寫物，最爲詳切者邪？故詩有六義焉。一曰興，二曰賦，三曰比。文已盡而意有餘，興也。因物喻志，比也。直書其事，寓言寓物，賦也。弘斯三義，酌而用之，幹之以風力，潤之以丹采，使味之者無極，聞之者動心，是詩之至也。若專用比興，則患在意深，意深則辭蹟若但用賦體，則患在意浮，意浮則文散，嬉成流移，文無止泊。有蕪漫之累矣。若夫春風春鳥，秋月秋蟬，夏

雲暑雨冬月祁寒斯四候之感諸詩者也嘉會寄詩以親離羣託
詩以怨至於楚臣去境漢妾辭宮或骨橫朔野或魂逐飛蓬或負
戈外戍或殺氣雄邊塞客衣單霜閨淚盡又士有解珮出朝一去
忘反女有揚蛾入寵再盼傾國凡斯種種感蕩心靈非陳詩何以
展其義非長歌何以釋其情故曰詩可以羣可以怨使窮賤易安
幽居靡悶莫尚於詩矣故辭人作者罔不愛好今之士俗斯風熾
矣裁能勝衣甫就小學必甘心而馳騫焉於是庸音雜體各爲家
法至於膏腴子弟恥文不逮終朝黠綴分夜呻吟獨觀謂爲警策
眾視終淪平鈍次有輕蕩之徒笑曹劉爲古拙謂鮑照義皇上人
謝朓今古獨步而師鮑照終不及日中市朝滿學謝朓劣得黃鳥
度青枝徒自棄於高聽無涉於文流矣矚觀王公搢紳之士每博
論之餘何嘗不以詩爲口實隨其嗜欲商榷不同淄澠並汎朱紫
相奪諠譁競起準的無依近彭城劉士章俊賞之士疾其淆亂欲

爲當世詩品。口陳標榜。其文未遂。傑感而作焉。昔九品論人。七略裁士。校以賓賓。誠多未值。至若詩之爲技。較爾可知。以類推之。殆同博奕。方今皇帝資生知之上才。體沈鬱之幽思。文麗日月。學究天人。昔在貴遊。已爲稱首。沉八紘。旣掩風塵。雲蒸抱玉者。連肩握珠者。踵武固以晚漢魏而弗顧。吞晉宋於胸中。諒非農歌輶議。敢致流別。傑之今錄。庶周遊於閭里。均之於談笑耳。梁書鍾榮傳

詩品上

古詩其體源出於國風。陸機所擬十四首。文溫以麗。意悲而遠。驚心動魄。可謂幾乎一字千金。其外去者。日以疏。四十五首。雖哀怨頗爲總雜。舊疑是建安中曹王所製。客從遠方來。橘柚垂華實。亦爲警絕矣。人代冥滅。而清音獨遠。悲夫。

漢都尉李陵詩。其源出於楚辭。文多悽愴。怨者之流。陵名家子。有殊才。生命不諧。聲顏身喪。使陵不遭辛苦。其文亦何能至此。

漢婕妤班姬詩其源出於李陵團扇短章辭旨清捷怨深文綺得匹婦之致侏儒一節可以知其工矣

魏陳思王植詩其源出於國風骨氣奇高詞彩華茂情兼雅怨體被文質繁溢今古卓爾不羣嗟夫陳思之於文章也譬人倫之有周孔鱗羽之有龍鳳音樂之有琴笙女工之有黼黻俾爾懷鉛吮墨者抱篇章而景慕映餘暉以自燭故孔氏之門如用詩則公幹升堂思王入室景陽潘陸自可坐於廊廡之間矣

魏文學劉楨詩其源出於古詩仗氣愛奇動多振絕真骨凌霜高風跨俗但氣過其文雕潤恨少然自陳思以下楨稱獨步

魏侍中王粲詩其源出於李陵發愀愴之詞文秀而質麗在曹劉間別構一體方陳思不足比魏文有餘

晉步兵阮籍詩其源出於小雅無雕蟲之功而詠懷之作可以陶性靈發幽思言在耳目之外情寄八荒之表洋洋乎會於風雅使

人忘其鄙近自致遠大頗多感慨之詞厥旨淵放歸趣難求顏延之註解怯言其志

晉平原相陸機詩其源出於陳思才高辭瞻舉體華美氣少於公幹文劣於仲宣尚規矩不貴綺錯有傷直致之奇然其咀嚼英華厭飫膏澤文章之淵泉也張公歎其大才信矣

晉黃門郎潘岳詩其源出於仲宣翰林歎其翩翩然如翔禽之有羽毛衣服之有綃縠猶淺於陸機謝混云潘詩爛若舒錦無處不佳陸文如披沙簡金往往見寶嶠謂益壽輕華故以潘勝翰林篤論故歎陸爲深余常言陸才如海潘才如江

晉黃門郎張協詩其源出於王粲文體華淨少病累又巧構形似之言雄於潘岳靡於太冲風流調達實曠代之高手詞彩蔥蒨音韻鏗鏘使人味之亹亹不倦

晉記室左思詩其源出於公幹文典以怨頗爲精切得諷諭之致

雖野於陸機而深於潘岳謝康樂常言左太沖詩潘安仁詩古今難比

宋臨川太守謝靈運詩其源出於陳思雜有景陽之體故尙巧似而逸蕩過之頗以繁蕪爲累矇謂若人興多才高博寓目輒書內無乏思外無遺物其繁富宜哉然名章迴句處處間起麗典新聲絡繹奔會譬猶青松之拔灌木白玉之映塵沙未足貶其高潔也初錢塘杜明師夜夢東南有人來入其館是夕卽靈運生於會稽旬日而謝立亡其家以子孫難得送靈運於杜治養之十五方還都故名客兒

詩品中

一品之中略以世代爲先後不以優劣爲詮次又其人旣往其文克定今所寓言不錄存者夫屬詞比事乃爲通談若乃經國文符應資博古撰德駁奏宜窮往烈至乎吟詠情性亦何貴於用事思

君如流水、既是即日、高臺多悲風、亦惟所見、清晨登隴首、羌無故
實、明月照積雪、詎出經史、觀古今勝語、多非補假、皆由直尋、顏延
謝莊尤無繁密、於時化之故、大明泰始中、文章殆同書抄、近任昉
王元長等、辭不貴奇、競須新事、爾來作者、浸以成俗、逐句無虛語、
語無虛字、拘攣補衲、蟲文已甚、但自然英旨、罕值其人、詞既失高、
則宜加事義、雖謝天才、且表學問、亦一理乎、陸機文賦通而無貶、
李充翰林疏而不切、王微鴻寶密而無裁、顏延論文精而難曉、摯
虞文志詳而博瞻、顏曰、知言、觀斯數家、皆就談文體、而不顯優劣、
至於謝客集詩、逢詩輒取、張騫文士逢文、卽書諸英志錄、並義在
文、曾無品第、嶸令所錄、止乎五言、雖然網羅今古、詞文殆集、輕欲
辨彰清濁、倚拓病利、凡百二十人、預此宗流者、便稱才子、至斯三
品升降、差非定制、方申變裁、請寄知者爾、

漢上計秦嘉妻徐淑詩、夫妻事既可傷、文亦悽怨、爲五言者、不

過數家而婦人居二徐淑敘別之作亞於團扇矣

魏文帝詩其源出於李陵頗有仲宣之體則新奇百許篇率皆鄙直如偶語惟西北有浮雲十餘首殊美贍可翫始見其工夫不然可以銓衡羣彥對揚厥弟者邪

晉中散嵇康詩頗似魏文過爲峻切訐直露才傷淵雅之致然託諭清遠良有鑒裁亦未失高流矣

晉司空張華詩其源出於王粲其體華豔興託不奇巧用文字務爲妍冶雖名高曩代而亮疏之士猶恨其兒女情多風雲氣少謝康樂云張公雖復千篇猶一體耳今置之中品疑弱處之下科惟少在季孟之間矣

魏尚書何晏晉馮翊守孫楚晉著作王讚晉王司徒掾張翰晉中書令潘尼詩平叔鴻雁之篇風規見矣子荆零雨之外正長朔風之後雖有累札良亦無聞季膺黃華之唱正叔緣繁之良雖不具

美而文彩高麗、並得虬龍片甲、鳳凰一毛、事同駁聖、宜居中品、
魏侍中應璩詩、祖襲魏文、善爲古語、指事殷勤、雅意深得、詩人激
刺之旨、至於濟濟今日所華、靡可諷味焉、

晉清河守陸雲、晉侍中石崇、晉襄城太守曹攄、晉朗陵公何劭、清
河之方平原、殆如陳思之匹、白馬於其哲昆、故稱二陸、季倫頗遠、
並有英篇、篤而論之、朗陵爲最、

晉太尉劉琨、晉中郎劉湛、詩其源出於王粲、善爲悽戾之詞、自有
清拔之氣、琨旣體良才、又罹厄運、故善敘喪亂、多感恨之辭、中郎
仰之微不逮者矣、

晉弘農太守郭璞、詩憲章潘岳、文體相輝、彪炳可翫、始變永嘉平
淡之體、故稱中興第一、翰林以爲詩首、但遊仙之作、辭多慷慨、乖
遠玄宗、而云奈何虎豹姿、又云戢翼棲榛梗、乃是坎壈詠懷、非列
仙之趣也、

晉吏部郎袁宏詩彥伯詠史雖文體未邁而鮮明緊健去凡俗遠矣

晉處士郭泰機晉常侍顧愷之宋謝世基宋參軍顧邁宋參軍戴凱詩泰機寒女之製孤怨宜恨長康能以二韻答四首之美世基橫海顧邁鴻飛戴凱人實貧羸而才章富健觀此五子文雖不多氣調警拔吾許其進則鮑照江淹未足逮止越居中品僉曰宜哉宋徵士陶潛詩其源出於應璩又協左思風力文體省靜殆無長語篤意真古辭興惋愜每觀其文想其人德世歎其質直至如歡言酌春酒日暮天無雲風華清靡豈直爲田家語邪古今隱逸詩人之宗也

宋光祿大夫顏延之詩其源出於陸機尚巧似體裁綺密情喻淵深動無虛散一句一字皆致意焉又喜用古事彌見拘束雖乖秀逸是經綸文雅才雅才減若人則蹈於困躓矣湯惠休曰謝詩如

芙蓉出水、顏如錯彩鏤金、顏終身病之、

宋豫章太守謝瞻、宋僕射謝混、宋太尉袁淑、宋徵君王微、宋征虜將軍王僧達詩、其源出於張華、才力苦弱、故務其清淺、殊得風流媚趣、課其實錄、則豫章僕射宜分庭抗禮、徵君太尉可託乘後車、征虜卓卓、殆欲度驂騑前、

宋法曹參軍謝惠連詩、小謝才思富捷、恨其蘭玉夙凋、故長轡未騁、秋懷擣衣之作、雖復靈運銳思、亦何以加焉、又工爲綺麗歌謠、風人第一、謝氏家錄云、康樂每對惠連、輒得佳語、後在永嘉西堂、思詩竟日不就、寤寐間忽見惠連、卽成池塘生春草、故常云此語有神助、非吾語也、

宋參軍鮑照詩、其源出於二張、善製形狀寫物之詞、得景陽之詠、詭合茂先之靡曼、骨節強於謝混、駐邁疾於顏延、總四家而擅美、跨兩代而孤出、嗟其才秀人微、故取湮當代、然貴尚巧似、不避危

仄頗傷清雅之調故言險俗者多以附照

齊吏部謝朓詩其源出於謝混微傷細密頗在不倫一章之中自有玉石然奇章秀句往往警邁足使叔源失步明遠變色善自發詩端而末篇多躓此意銳而才弱也至爲後進士子之所嗟慕朓極與余論詩感激頓挫過其文

齊光祿江淹詩文通詩體總雜善於摹擬筋力於王微成就於謝朓初淹罷宣城郡遂宿野寺夢一美丈夫自稱郭璞謂淹曰吾有筆在卿處多年矣可以見還淹探懷中得五色筆以授之爾後爲詩不復成語故世傳江淹才盡

梁衛將軍范雲梁中書郎丘遲詩范詩清便宛轉如流風迴雪丘詩點綴映媚似落花依草故當淺於江淹而秀於任昉

梁太常任昉詩彥昇少年爲詩不工故世稱沈詩任筆昉深恨之晚節愛好旣篤又亦道變若銓事理拓體淵雅得國士之風故擢

中品。但昉既博物，動輒用事，所以詩不得奇。少年士子效其如此，弊矣。

梁左光祿沈約詩，觀休文眾製，五言最優。詳其文體，察其餘論，固知憲章鮑明遠也。所以不閑於經綸，而長於清怨。永明相王愛文，王元長等皆宗附之。約於時謝朓未遭，江淹才盡，范雲名級故微，故約稱獨步。雖文不至其工麗，亦一時之選也。見重閭里，誦詠成音，蝶謂約所著既多，今剪除涇雜，收其精要，允爲中品之第矣。故當詞密於范，意淺於江也。

詩品下

昔曹劉殆文章之聖，陸謝爲體貳之才，銳精研思，千百年中，而不聞宮商之便，四聲之論，或爲前達偶然不見，豈其然乎？嘗試言之。古曰詩頌，皆被之金竹，故非調五音，無以諧會。若置酒高堂，上明月照高樓，爲韻之首，故三祖之詞，文或不工，而韻入歌唱，此重音

韻之義也。與世之言宮商異矣。今既不備管絃。亦何取於聲律邪。齊有王元長者。嘗謂余云。宮商與二儀俱生。自古詞人不知之。惟顏憲子乃云。律呂音調。而其實大謬。惟見范曄謝莊乃識之耳。常欲進知音論。未就。王元長創其首。謝朓沈約揚其波。三賢或貴公子孫。幼有文辨。於是士流景慕。務爲精密。褻積細微。專相凌架。故使文多拘忌。傷其真美。余謂文製本須諷讀。不可蹇礙。但令清濁通流。口吻調利。斯爲足矣。至平上去入。則余病未能。蜂腰鶴膝。闕里已具。陳思贈弟仲宣七哀。公幹思友阮籍詠懷。子卿雙鳧。叔夜雙鸞。茂先寒夕。平叔衣單。安仁倦暑。景陽苦雨。靈運鄴中。士衡擬古。越石感亂。景純詠仙。王微風月。謝客山泉。叔源離宴。鮑照戍邊。太冲詠史。顏延入洛。陶公詠貧之製。惠連擣衣之作。斯皆五言之警策者也。所謂篇章之珠澤。文彩之鄧林。

漢令史班固。漢孝廉酈炎。漢上計趙壹。詩孟堅才流。而老於掌故。

觀其詠史有感歎之詞文勝託詠靈芝懷寄不淺元叔散憤蘭蓀
指斥囊錢苦言切句良亦勤矣斯人也而有斯因悲夫

魏武帝魏明帝曹公古直甚有悲涼之句韋不如丕亦稱三祖
魏白馬王彪魏文學徐幹白馬與陳思答贈偉長與公幹往復雖
曰以莛扣鐘亦能閑雅矣

魏倉曹屬阮瑀晉頓丘太守歐陽建晉文學應璩晉中書令稽含
晉河南太守阮侃晉侍中嵇紹晉黃門瑒據元瑜關右七君詩並
平典不失古體大檢似而二嵇微優矣

晉中書張載晉司隸傅玄晉太僕傅咸侍中繆襲散騎常侍夏侯
湛孟陽詩乃遠慙厥弟而近超兩傅長虞父子繁富可嘉孝冲雖
曰後進見重安仁熙伯挽歌唯以造哀爾

晉驃騎王濟晉征南將軍杜預晉廷尉孫綽晉徵士許詢永嘉以
來清虛在俗王武子輩詩貴道家之言爰泊江表玄風尙備眞長

仲祖桓庾諸公猶相襲世稱孫許彌善恬淡之詞

晉徵士戴逵晉東陽太守殷仲文晉宋之際殆無詩乎義熙中以謝益壽殷仲文爲華綺之冠殷不競矣宋尚書令傅亮季友文余常忽而不察今沈特進撰詩載其數首亦復平矣

宋記室何長瑜羊曜璠宋詹事范曄詩乃不稱其才亦爲鮮舉矣宋孝武帝宋南平王鑠宋建平王安孝武詩彫文織絲過爲精密爲二藩希慕見稱輕巧矣

宋光祿謝莊希逸詩氣候清雅不逮於王袁然興屬閑長良無鄙促也

宋御史蘇寶生宋中書令史陵修之宋典祠令任曇緒宋越騎戴法興蘇陵任戴並著篇章亦爲摯紳之所嗟詠人非文才是愈甚可嘉焉

宋監典事區惠恭惠恭本胡人爲顏師伯幹顏爲詩筆輒偷定之

後造獨樂賦語侵給主被斥及大將軍修北第差充作長時謝惠連兼記室參軍惠恭時往共安陵嘲調末作雙枕詩以示謝謝曰君誠能恐人未重且可以爲謝法曹造大將軍見之賞歎以錦二端賜謝謝辭曰此詩公作長所製請以錦賜之

齊惠休上人齊道猷上人齊釋寶月惠休淫靡情過其才世遂匹之鮑照恐商周矣羊曜璠云是顏公忌照之文故立休鮑之論庾白二胡亦有清句行路難是東陽柴廓所造寶月嘗憩其家會廓亡因竊而有之郭子賁手本出都欲訟此事乃厚賂止之

齊高帝齊征北將軍張永齊太尉王文憲齊高帝詩詞藻意深無所云少張景云雖謝文體頗有古意至如王師文憲既經國遠圖或忽是雕蟲

齊黃門謝超宗齊尋陽太守王靈鞠齊給事中郎劉祥齊司徒長史檀超齊正員郎鐘憲齊諸暨令顏則齊秀才顧則心詩檀謝七

君並祖襲顏延欣欣不倦得士大夫之雅致乎余從祖正員常云
大明泰始中鮑休美文殊以動俗惟此諸人傅顏陸體用固執不
如顏諸諸暨最荷家聲

齊參軍毛伯成齊朝請吳邁遠齊朝請許瑤之詩伯成文不全佳
亦多悵惆吳善於風人答贈許長於短句詠物湯遠休謂遠云吾
語可爲汝詩父以訪謝光祿云不然爾湯可爲庶況

齊鮑令暉齊韓蘭英令暉歌詩往往蘄絕清巧擬古尤勝惟百願
淫矣照常答孝武云臣妹才自亞於左芬臣才不及太冲爾蘭英
綺密甚有名篇又善談笑齊武謂韓云借使二媛生於上葉則王
階之賦統素之辭未詎多也

齊司徒長史張融齊詹事孔稚珪思光紆緩放縱有乖文體然亦
捷疾豐饒差不局促德璋生於封谿而文爲雕飾青於藍矣
齊寧朔將軍王融齊中庶子劉繪元長士章並有盛才詞美英淨

至於五言之作幾乎尺有所短譬應變將略非武侯所長未足以
貶臥龍

齊僕射江祐詩猗猗清潤弟祀明靡可懷

齊記室王中齊綬遠太守卞彬齊端溪令卞錄王中二卞詩並愛
奇嶮絕慕袁彥伯之風雖不弘綽而文體刪淨去平美遠矣

齊諸暨令袁嘏詩平平耳多自謂能常語徐太尉云我詩有生氣
須人捉著不爾便飛去

齊雍州刺史張欣泰梁中書郎范縝詩欣泰子真並希古勝文闢
薄俗製賞心流亮不失雅宗

梁秀才陸厥觀厥文緯具識丈夫之情狀自製未優非言之失也
梁常侍虞羲梁建陽令江洪子陽詩奇句清拔謝朓常嗟頌之洪
雖無多亦自能迴出

梁步兵鮑行卿梁晉陵令孫察行卿少年甚擅風謠之美察最幽

微而感賞至到耳

賜進士出身二品銜廣東等處提刑按察使司按察使兼管驛傳事務黃岡王鏡藻校刊

全梁文卷五十五終

全梁文卷五十六

烏程嚴可均校輯

劉之遴

之遴字思貞小字僧伽南陽涅陽人宋當陽令則子齊永明末舉秀才除寧朔主簿入梁歷太學博士平南行參軍尚書起部郎延陵令荊州治中宣惠記室通直散騎侍郎兼中書通事舍人遷正員郎尚書右丞荊州太中正中書侍郎鴻臚卿出爲征西長史南郡太守轉西中郎長史徵祕書監領步兵校尉歷太府卿都官尚書太常卿太清二年避侯景之難還鄉未至卒年七十二有前集十一卷後集二十一卷

乞皇太子爲劉顯誌銘啟

之遴嘗聞夷叔柳惠不逢仲尼一言則西山餓夫東國黜士名豈施於後世信哉生有七尺之形終爲一棺之土不朽之事寄之題

目懷珠抱玉有歿世而名不稱者可爲長太息孰過於斯竊痛友人沛國劉顯祖積藝文研精覃奧聰明特達出類拔羣闔棺郢都歸魂有日須鐫墓板之迷已略撰其事行今輒上呈伏願鴻慈降茲睿藻榮其枯骸以慰幽魂冒昧塵聞戰慄無地

梁書劉顯傳

與劉孝標書

聞聞足下作類苑括綜百家馳騁千載彌綸天地纏絡萬品撮道略之英華搜羣言之隱隱必摘既畢殺青已就義以類聚事以聲分述征之妙楊班儔也擅此博物何快如之雖復子野調聲寄知音於後世文信構覽懸百金於當時居然無以相尚自非沈鬱澹雅之思安能閉志經年勒成若此吾嘗聞爲之者勞觀之者逸足下已勞於精力宜令吾見異書

藝文類聚五十八

弔震法師亡書

弟子劉之遴頓首和南泡電倏忽三相不停苦空無我五音寧住

尊師僧正捨壽閻浮遷神妙樂雖乘此宿殖必登善地人情怛化
銜疚悲摧念在三之重追慕哀慟纏綿永往理不可任奈何奈何
僧正精理特拔經綸洽通蔬菲終身有爲略盡枯槁當年儀形二
眾豈直息心標領亦爲人倫之傑弟子少長游遇數紀迄茲平生
敬仰善友斯寄衰疾待盡不獲臨泄顛慟之懷二三增楚扶力修
嘯迷猥不次弟子劉之遴頓首和南

廣弘明集
二十四

與震法師兄李敬肅書

生滅無常賢弟震法師奄同力士生處道識長往法言永絕惋怛
拙摧不能已已年事未高德業方播疾恙甫爾謂無過憂遂至遷
化道俗驚愕念孔懷之切天倫至慟永往之情不可居處奈何奈
何法師義味該洽領袖黑衣識度愷愷藉甚當世昔在京師聖上
眎接自還鄉國歷政禮重且講說利益旣實弘多經始寺廟實廣
福業襟抱豁然與物無迁所與遊款皆是時賢白黑歸美近遠欽

敬、豈止息心殄悴、實亦人倫喪寶、追懷歎愴、何可弭歇、并辱遺書、及別物、對增哽歔、殿下自作爲銘、又教鮑記室爲誌序、恐鮑相悉、未能究盡、已得面爲鮑說諸事、行及微猷計、必勒不朽、事如今日、誌石爲薦、并呼師修之鐫刻、亦當不久可就、言增泣然、投筆悽慙、劉之遴頓首頓首、廣弘明集二十四

弔僧正京法師亡書

八月二十日之遴和南、法界空虛、山水墮壞、尊師大正遷神淨土、凡夫賤累、嬰滯哀樂、承此凶訃、五內抽摧、愛慟深至、不能自己、念追慕永往、纏綿斷絕、情在難居、奈何奈何、大正德冠一時、道蔭四部、訓導學徒、紹隆像法、年居僧首、行爲人師、公私瞻敬、遐邇宗仰、若乃五時九部、流通解說、匹之前輩、聯類往賢、雖什肇融恆、林安生遠、豈能相尚、頓悟雖出自生公、弘宣後代、微言不絕、實賴夫子、重以愛語利益、窮四攝之弘教、檀忍知慧、備六度之該明、白黑歸

依含識知庇舟航愚冥棟梁寺塔日用不知至德潛運何道長而
世短功被而身歿映乎大海永墜須彌照彼高山長收朗日往矣
奈何當復奈何法師幼而北面生小服膺迄乎耄邁恆在左右在
三之重一旦傾殞哀痛之至當何可處弟子紈綺遊接五十餘年
未隆知顧相期法侶至乎菩提不敢生慢未來難知現在長隔眷
言生平永同萬古尋思惋愴倍不自勝末由彥執伸泄哀歎謹裁
白書投筆哽哽弟子劉之遴頓首和南

廣弘明
二十四

與印閣黎書

大喜稽首和南大喜精誠無感奄丁禍亂攀號永往五內屠鯨自
咎自悼萬歿何補慈母臨終正念不亂繫想諸佛及本師至平壽
盡凡夫念著母子恩深嬰此長別肝心破潰不能自任遺旨以三
十兩上金奉別充道場功德九月二十八日奉塋安厝終始永畢
不可復希長號懊惱無心苟存伏度聞問理垂哀愍所希運心救

拔必使亡靈遊於淨土不圖此啟臨紙崩絕大喜和南廣弘明集二十八上具古本漢書異狀十事

案古本漢書稱永平十六年五月二十一日己酉郎班固上而今本無上書年月日字又案古本敘傳號爲中篇今本稱爲敘傳又今本敘傳載班彪事行而古本云稚生彪自有傳又今本紀及表志列傳不相合爲次而古本相合爲次總成三十八卷又今本外戚在西域後古本外戚次帝紀下又今本高五子文三王景十三王武五子宣元六王雜在諸傳秩中古本諸王悉次外戚下在陳項傳前又今本韓彭英盧吳述云信惟餓隸布實黥徒越亦狗盜芮尹江湖雲起龍驤化爲侯王古本述云淮陰穀穀杖劍周章邦之傑子實惟彭英化爲侯王雲起龍驤又古本第三十七卷解音釋義以助雅詁而今本無此卷梁書劉之遴傳應皇太子令爲劉顯墓誌銘

繁弱挺質空桑吐聲分器見重播樂傳名誰其均之美有髦士禮
著幼年業明壯齒厭飫典墳研精名理一見弗忘過目則記若訪
賈逵如問伯始頽脫斯出學優而仕議獄既佐芸蘭乃握搏鳳池
水推羊太學內參禁中外相藩岳斜光已道殞彼西浮百川到海
還逐東流營營返魄汎汎虛舟白馬向郊丹旒背輦野埃興伏山
雲輕重呂掩書墳揚歸立冢爾其戒行途窮土壘弱葛方施叢柯
日拱檉柳黃春禽寒斂氄長空常暗陰泉獨湧耐彼故壑流芬相
踵

梁書劉
顯傳

丘遲

遲字希範吳興烏程人齊常侍靈鞠子州辟從事舉秀才除太
學博士遷大司馬行參軍歷西中郎參軍殿中郎車騎錄事參
軍梁臺建爲驃騎主簿及受禪拜散騎侍郎遷中書侍郎領吳
興邑中正爲永嘉太守遷爲臨川王宏中軍諮議參軍拜中書

郎遷司徒從事中郎天監七年卒有集鈔四十卷集十一卷

梁書

上遷傳高祖平京邑時勸進
梁王文及殊禮皆遲文也

思賢賦

豈顧問哉相然信死斯則結深念於撫翼跂雄飛而但起知我於
財利之間何足多於鮑子目擊而道存至味其如水未見其人吾
聞其理矣夫子長之託意甘執鞭於異世在慈明之慕義聊慙馭
而追悅況至德之可師無兼裘以共弊有樂安之任子倬羣才而
稱傑備百行之高致該九流之洪藝諒可雜而非染迹每同而常
別牆易入而難窺關無鍵而有閉思若神而泉涌翰如雲而積袂
沈潛於懷抱之間蕭散於天人之際日下愧其未雙關西慙於上
哲紛吾既有此固陋荷君子之渥惠塵非府而分深葉未移而好
結尋宿草之冥處歷三紀於茲日性有同於杞梓心獲變於丹漆
文何屬而不辯理何疑而匪質問不休而鍾扣答無窮而座謚

文

還林賦

爰自京師言歸舊嶺今風古轍每動寸衷因事而書不覺成卷非
謂爲文聊記行途所經云爾太倅弭節祝融登駕炎鍾汎響青籥
靜吹丘子稅轡畿路總舳川泥撼魂故嶺結夢舊堤揆身世而載
懷鏡古今而興辭驗難停於揚轍昭易改於墨絲匪追舉而辯命
豈適伊而問蓍擔簦無白璧之想負書靡黑豹之悲纔解山潮首
顧京滬仰絳堞之紛迴與素津之容裔荃橈往來芟葢經過依稀
子陵之釣髣髴滄浪之歌出入風霞游息雲露階自禽飛聽高月
度踟躕七敘徘徊五禮永翦帶於關上長緝巾乎林底藝文類聚
二十七

永嘉郡教

貴郡控帶山海利兼水陸實東南之沃壤一都之巨會而曝背拘
牛屢空於畎畝績麻治絲無間於室巷其有耕灌不修桑榆靡樹

遨遊鄼里、酣醕卒歲、越伍乖鄰、流宕忘返、才異相如、而四壁獨立、高慚仲蔚、而三徑沒人、雖謝文翁之正俗、庶幾龔遂之移風、類聚

十五
爲王博士讓表

臣聞撫臆可以言心、量能則知所止、是故矯親魯門、簡業事亡、雜吹齊雅、分聲遽逝、臣才行過污、文質無廉、疏達謝於谷杜、浹洽乖夫劉楊、非除部養之勤、豈通掌固之業、類聚

爲范尚書拜表

昔滕公移晷於泗亭、陳遂留懼於博進、祿止一守、官窮九列、臣獲照秋陽、取沃淮海、發蒙去眚、已若松喬、匪富伊榮、須臾至此、賞參十亂、躬越五水、歷覽前載、孰與爲匹、類聚

爲范衛軍讓梁臺侍中表

是以懷鉛早歲、不以隕穫累心、臨履晚年、豈以克勤在念、易農伊

秦仕焉已幸遂復分竹九疑擁旄百越值天地中間神武再廓
絲是蓄管窠靡遺今霸運肇基四海明目樞機規獻實在得人
況處庸微何用膺荷

魏文類聚四十八
劍覽二百十九

為何尙書重讓侍中領驍騎表

臣擢自散輩之中實彼周行之上既慙伯豪使天下慎選又乖平
叔令内外得人且玉壺獨掌見榮昌期當尺可參必簡英俊

魏文類聚

四十人

爲柳僕射讓光祿表

竊聞敬孫以規獻爲職彝品常貴飛翠鳴玉升降禁門臣以疢疾
豈伊或忝匪稱其服終朝三褫近取諸身皎日非喻臣之庸薄文
塵物論假以克壯報效無階而嬰離沈痼日月滋甚聖朝畱管
之舊愍降帷蓋之餘矜榮不徒行事存寵渥

魏文類聚
四十九

荅舉秀才啟

方今八友盈庭五承在幄七教畢脩九攻具舉猶乃物色闡曷夢
想巖釣故已天不愛寶野無遺賢輒仰宣皇猷俯藉愚蔽覘察衡
閭詢事茅草如有片言入善一介可題謹聞終闕恭奏青蒲蘇文類聚

爲范雲謝示毛龜啟

玄甲應於姬涓青髯符於夏室翱翔卷目之陰浮遊蓬萊之上藏
采千載獻狀一朝斯誠陛下至德動天窮神爲化故能寶瑞間圖
珍祥映諜間出蕃猷繼踵郊甸藝文類聚九十九

與陳伯之書

出世當作
世出

遲頓首陳將軍足下無恙幸甚幸甚將軍勇冠三軍才爲出世棄
鷺雀之小志慕鴻鵠以高翔昔因機變化遭遇明主立功展事開
國稱孤朱輪華轂擁旄萬里何其壯也如何一旦爲奔亡之虞間
鳴鏑而股戰對穹廬以屈膝又何劣邪尋君去就之際非有他故

知平脫此
字

直以不能內審諸己外受流言沈迷猖獗以至於此聖朝赦罪責
功棄瑕錄用推赤心於天下安反側於萬物將軍之所知不假僕
一二談也朱鮪涉血於友于張繡剗刃於愛子漢主不以爲疑魏
君待之若舊況將軍無昔人之罪而勳重於當世夫迷塗知反往
哲是與不遠而復先典攸高主上屈法申恩吞舟是漏將軍松柏
不翦親戚安居高臺未傾愛妾尙在悠悠爾心亦何可言今功臣
名將雁行有序佩紫懷黃讚帷幄之謀乘輅建節奉疆場之任並
刑馬作誓傳之子孫將軍獨覩顏借命驅馳甌裘之長寧不哀哉
夫以慕容超之強身送東市姚泓之盛面縛西都故知霜露所均
不育異類姬漢舊邦無取雜種北虜僭盜中原多歷年所惡積禍
盈理至焦爛況僞孽昏狡自相夷戮部落攜離首豪猜貳方當繫
頸蠻貊懸首棄街而將軍魚游於沸鼎之中鷺巢於飛幕之上不
亦惑乎暮春三月江南草長雜花生樹羣鸞亂飛見故國之旗鼓

感平生於疇日、撫絃登陴、豈不愴恨、所以廉公之思趙將、吳子之泣西河、人之情也、將軍獨無情哉、想早勵良規、自求多福、當今皇帝盛明、天下安樂、白環西獻、楛矢東來、夜郎滇池、解辯請職、朝鮮昌海、蹶角受化、唯北狄野心、掘強沙塞之間、欲延歲月之命耳、中軍臨川殿下、明德茂親、總茲戎重、弔民洛汭、伐罪秦中、若遂不改、方思僕言、聊布往懷、君其詳之、文選梁書陳伯之傳南史六十一載文類聚一

五十

硯銘

硯水

壁

藝文類聚
五十八

硯賦

侍中吏部尚書何府君誄

遠量夷狄、淹姿英茂、進德方新、循名以舊、分鑑先達、爭驅俊秀、匪

直羽儀實惟領袖知人斯哲在帝之難僉謂往諧是謂能官園阿
望幣釣嶼投竿金張之貴允茲七侍有美一人柔紹三珥服苑乘
軒鳴玉飛翠不貪爲寶貴而能貧唯靜是悅惟寂是珍履信茲從
積善方慶如何斯德曾是知命彼高者天與人焉咏眇望周行式
瞻林壑灑沃紛埃擯揚流俗言必立遠神唯珠玉色恬喜愜心豈

榮辱

藝文類聚
四十八

裴遜

遜字淵明河東聞喜人齊建武初爲府主簿舉秀才對策高第
除奉朝請東昏嗣位爲撫軍始安王參軍尋奔魏爲司徒屬中
書郎魏郡太守天監初自拔還朝除後軍諮議參軍出爲輔國
將軍廬江太守加右軍將軍封夷陵縣子遷冠軍長史廣陵太
守左遷始安太守未至郡遷右軍諮議參軍豫章王雲麾府司
馬出爲竟陵太守遷遊擊將軍又遷假節明威將軍西戎校尉

北梁秦二州刺史還爲給事中雲騎將軍朱衣直閭將軍遷大
匠卿晉通中爲假節信武將軍除持節北徐州刺史未之職遷
豫州刺史進號宣毅將軍卒贈侍中左衛將軍進爵爲侯諡曰
烈

致呂僧珍書

昔阮或顏延有二始之歎吾才不逮古人今爲三始非其願也將
如之何

梁書裴邃傳邃左遷始安太守乃致書於呂僧珍

移魏揚州刺史長孫稚

魏始於馬頭置戍如聞復欲修白捺舊城若爾便稍相侵迫此亦
須營歐陽設交境之備今板卒已集唯聽信還

魏書楊播附傳梁豫州刺史裴邃治

合肥規襲壽春已募勒兵士而慮壽春疑覺遂謬移云

裴之橫

之橫字如岳邃兄髦之第十二子爲河東王常侍直殿主帥還

直閣將軍侯景亂出爲貞威將軍元帝承制除散騎常侍廷尉卿出爲河東內史遷持節平北將軍東徐州刺史中謨軍封豫寧侯承聖中除吳興太守敬帝承制除使持節鎮北將軍徐州刺史拒蕭淵明於東關敗死贈侍中司空謚曰忠壯

荅貞陽侯書

之橫白足下定國等至枉雅誨具高氏致送之旨卽彼行人遠到京城大慰應有成命但江山貿阻未奉朝廷報辭第下國之麟趾先朝所寄籍彼鄰好義深主祀自宜單車入境端委還朝而朱旆啟行戎旌望國江東士子未達高懷僕早預簪裾風叨眷與弦矢旣睽江淮成阻青黎裁封雖繼西鳥之辭白雪在天豈無北風之歎但變故紛紛忠貞宜顯寒松負雪誠愧節者之徒勁草疾風寧忘烈士之槩齊師若反旆淮路退舍肥水彼之敬送止縉紳之徒此之奉迎則軒蓋而已伏聽朝旨遲申展敬之橫白

文苑英華六百七十七

丘仲孚

仲孚字公信吳興烏程人齊永明初選爲國子生舉高第未調還鄉爲盜郡召補主簿歷揚州從事太學博士于湖令父憂去職明帝卽位起爲烈武將軍曲阿令遷山陰令以賊敗會赦入梁復爲山陰令治爲天下第一超遷車騎長史長沙內史徵爲尙書右丞遷左丞進衛尉卿歷南郡江夏太守終豫章內史卒贈給事黃門侍郎有皇典二十卷南宮故事百卷

答釋法雲書難范縝神滅論

伏覽敕旨荅臣下審神滅論聖照淵深句括眞俗理超繫表義貫羣識鑽奉神猷伏深舞蹈惠示銜戢存眷丘仲孚白

弘明集十

馬元和

元和齊末爲兗州刺史天監初歷司農郎

答釋法雲書難范縝神滅論

辱告、頒示敕旨、垂咎臣下、審臣滅論、竊聞標機之旨、非凡所窺、符
神之契、惟仁是極、故眾教表徊、理詣於惇善、羣經委曲、事盡於開
濟、伏惟至尊、先天製物、體道裁化、理絕言初、思包象外、攻塞異端、
闡道歸一、萬有知宗、人天仰式、信滄海之舟梁、玄霄之日月也、神
滅之論、宜所未安、何者、前聖摛教、抑引不同、括而言之、理實無二、
易云、積善之家、必有余慶、積不善之家、必有余殃、孝經云、生則親
安之、祭則鬼享之、雖未顯論三世、其旨已著、薪盡火滅、小乘權教、
妙有湛然、究竟通說、因情卽理、理實可依、且慎終追遠、民德歸厚、
禮有國有家、歷代由之、三才之寶、不同降清、神滅之爲論、妨政實
多、非聖人者、無法、非孝悌者、無親、二者俱違、難以行於聖世矣、弟
子庸乏、慙於至道、濫蒙頒訪、所據凡淺、荷惕之誠、追以無厝、弟子
馬元和、和南、引明集十

蔡傳

傳一作摘字景節濟陽考城人宋左光祿興宗子仕齊至給事黃門侍郎入梁終吳郡太守卒贈金紫光祿大夫諡康子

答釋法雲書難范縝神滅論

辱告奉宣敕旨答諮神滅論夫神理玄妙良難該辨雖復前聖眷言後英猶惑叡旨爰釋皎若發蒙固以陵萬古而擅奇悟方來以不朽伏奉朝聞載深抃躍謹以書紳永祛迷滯蔡傳和南

弘明集十

賜進士出身二品銜廣東等處提刑按察使司按察使兼管驛傳事務副王毓藻校刊

全梁文卷五十七

烏程嚴可均校輯

劉峻

峻字孝標初名法武平原平原人齊永明中南奔建武中爲豫州府刑獄梁受禪召入西省免安成王引爲荊州戶曹參軍以疾去職居東陽之紫巖山普通二年卒門人諡曰立靖先生有世說注十卷集六卷

送橘啟

南中橙甘青鳥所食始霜之旦采之風味照座劈之香霧噴人皮薄而味珍脈不黏膚食不留滓甘踰萍實冷亞冰壺可以熏神可以茗鮮可以漬蜜擅鄉之果盛有此邪

橘錄

荅郭峙書

聞君子舊矣但人非豕鹿轉加蓬逝波駭雨散動間山川故無由

交羽觴薦雜佩。睨浮雲以搔首。臨清風而浩歌。變燧迴星亦云勞。

止

藝文類聚三十

追答劉秣陵沼書

劉侯既重有斯難。值余有天倫之戚。竟未致之也。尋而此君長逝。化爲異物。緒言餘論。蘊而莫傳。或有自其家得而示余者。余悲其音徽未沫。而其人已亡。青簡尙新。而宿草將列。泫然不知涕之無從也。雖隄駟不置。尺波電謝。而秋菊春蘭。英華靡絕。故存其梗概。更酬其旨。若使墨翟之言無爽。宣室之談有徵。冀東平之樹望咸陽。而西靡蓋山之泉。聞絃歌而赴節。但懸劍空壠。有恨如何。文選梁書

劉峻傳藝文類聚三十四

與宋玉山元思書

驅馬金張之館。飛蓋許史之廬。習匡鼎之說詩。騁谷雲之雕篆。賓徒波湧。輿輪靡息。當是時也。樂可言哉。然靜思夫君。愀焉軫歎。何

則方鑿圓枘，鉏鋤難從。翔鳥遊魚，蹊蹢不狎。是以賈生懷琬琰而挫翫，馮子握璵璠而鍛羽。天誕英逸，獨擅民秀。心貞筠箭，德潤珪璋。信人口口，水鏡一性之鎔範。而荆南雅曲，高首鮮和。河西名驥，滅沒誰賞。故若先生者，進有三難，退有三樂。竊觀先生未能鴻翔鸞起，騰霞躋漢。將由囿空桑麻，田無負郭。俛眉翦肩，以斯故爾。今賢弟賓從，抗鱗奮翼，或衣繡江塘，或鳴騶洛渚。連騎方驅，擊鍾乃食。琴附若是，吾子復何憂哉！唯當纂兩仲之微迹，襲二疏之風流。生與漁父同儔，死葬要離墓側。金石可碎，聲垂無寂。斯道坦坦，先生幸其勛與。

藝文類聚
三十七

荅劉之遴借類苑書

九冬有隤，三餘暇時。多遊書圖，代樹萱蘇。若夫疊疊於紉紉，閱微言於殘竹。嗛飫膏液，咀嚼英華。不知地之爲輿，天之爲蓋。靡測迴塘，其辯輿馬。烏足以言乎？是用周流墳素，詳觀圖牒。搦管聯冊，纂

茲英奇蛩蛩之謀止於善草周周之計利在銜翼故鳩集斯文益
自綴其漏耳豈冀藏山之石播於士大夫哉藝文類聚五十八

與諸弟書

任既假以吹噓各登清貫任云亡未幾子姪漂流溝渠洽等視之
悠然不相存臆平原劉峻疾其苟且乃廣朱公叔絕交論焉文選廣絕

交論

與何炯書稱劉訐劉歊

訐超超越俗如天半朱霞歊矯矯出塵如雲中白鶴皆儉歲之梁
稷寒年之繼纈南史四十九劉訐傳族祖孝標與書稱之

與舉法師書

聞諸行李高談微德逖聽風聲心飛魂竦無異斬仙之望石髓太
陰之思龍燭蒼星昏昃涼雲送秋道勝則肥固應頤攝衣裳虹蜺
帷幕霄露餌黃菊之落葉酌清澗之流泉旦候歸雁晨鳧暮聽羈

雌獨鶴、神影影爾、蓋象蕭史之騎鳴鳳、列子之御長風、雖荆卿、若無人、孝然堅臥冰雪、沈沈隱隱、何以尚之哉、至於馳騫經囿、剗翔書圃、極龍宮之妙典、彈石室之鴻記、道生伏其天真、曼倩謝其辨物、若乃習是童子、措志雕蟲、藻思內流、英華外發、歲裂秋竹、照曜春松、爵頌息明珠之譽、長門濫黃金之賞、盛矣美矣、燠其麗乎、昔旅浙河、嘗觀組纈、不覺紙焚筆焚、魂魄斯盡、自茲厥後、兩絕珪璧、意睠睠於菁華、腸迴迴於九逝、夫日御停照、不踰隙穴、海若瀟瀟、其限隈隅、以玉抵鵲、昔傳餘寶、冀開清微、用瘳眩疾、然越民非帶冠之所、齊國豈奏韶之地、望與其進、無貽責焉、釋藏經九廣宏明集二十四

辯命論

并序

主上嘗與諸名賢言及管輅、歎其有奇才而位不達、時有在赤墀之下、豫聞斯議、歸以告余、余謂士之窮通、無非命也、故謹述天旨、

梁書作大目

因言其志云

臣觀管輅天才英偉珪璋特秀實海內之名傑

梁書作
瑩傑

豈日者卜

視之流乎而官止少府丞年終四十八天之報施何其寡與然則
高才而無貴仕饔饔而居大位自古所歎焉獨公明而已哉故性
命之道窮通之數天閕紛綸莫知其辯仲任蔽其源子長闢其惑
至於鵠冠羲牖必以懸天有期鼎貴高門則曰唯人所召譏譏謹
昨異端斯起蕭遠論其本而不暢其流子玄語其流而未詳其本
嘗試言之曰夫通生萬物則謂之道生而無主謂之自然自然者
物見其然不知所以然同焉皆得不知所以得鼓動陶鑄而不爲
功庶類混成而非其力生之無亭毒之心死之豈虔劉之志墜之
淵泉非其怒升之霄漢非其悅蕩乎大乎萬寶以之化確乎純乎
一化而不易化而不易則謂之命命也者自天之命也定於冥兆
終然不變鬼神莫能預聖哲不能謀觸山之力無以抗倒日之誠
弗能感短則不可緩之於寸陰長則不可急之於箭刻至德未能

踰上智所不免是以放勛之世浩浩襄陵天乙之時焦金流石文
公隨其尾宣尼絕其糧顏回敗其叢蘭冉耕歌其芡苒夷叔斃淑
媛之言子輿困臧倉之訴聖賢且猶若此而況庸庸者乎至乃伍
員浮尸於江流三閭沈骸於湘渚賈大夫沮志於長沙馮都尉削
髮於郎署君山鴻漸鍛羽儀於高雲敬通鳳起推迅翮於風穴梁書
作風此豈才不足而行有遺哉近世有沛國劉瓛瓛弟璡並一時
之秀士也瓛則關西孔子通涉六經循循善誘服膺儒行璡則志
烈秋霜心貞崑玉亭亭高竦不雜風塵皆毓德於衡門並馳聲於
天地而官有微於侍郎位不登於執戟相次梁書作相繼殂落宗祀無
響因斯兩賢以言古則昔之玉質金相英髦秀達皆擯斥於當年
韞奇才而莫用梁書作候微草木以共彫與麋鹿而同死膏塗平原骨
填川谷湮滅而無聞者豈可勝道哉此則宰衡之與阜隸容彭之
與殤子猗頓之與黔婁陽文之與敦洽咸得之於自然不假道於

才智故曰死生有命富貴在天其斯之謂矣然命體周流變化非一或先號後笑或始吉終凶或不召自來或因人以濟交錯糾紛迴還倚伏非可以一理徵非可以一途驗而其道密微寂寥忽恍無形可以見無聲可以聞必御物以效靈亦憑人而成象譬天王之冕旒任百官以司職而或者觀湯武之龍蹕謂龕亂在神功間孔墨之挺生謂英睿擅奇響視彭韓之豹變謂鷲猛致人爵見張桓之朱紱謂明經拾青紫豈知有力者運之而趨乎故言而非命有六蔽焉爾請陳其梗概夫靡顏膩理哆嚙頰頰形之異也朝秀晨終龜鵠千歲年之殊也聞言如響智昏菽麥神之辨也同知三者定乎造化榮辱之境獨曰由人是知二五而未識於十其蔽一也龍犀日角帝王之表河目龜文公侯之相撫鏡知其相刑歷紐顯其膺錄星虹樞電昭聖德之符夜哭聚雲鬱興王之瑞皆兆發於前期渙汗於後葉若謂驅貔虎奮尺劍入紫微升帝道則未達

冥冥之情未測神明之數其蔽二也空桑之里變成洪川歷陽之
都化爲魚鼈楚師屠漢卒睢河鯁其流秦人坑趙士沸聲若雷震
火炎崑崙礫石與琬琰俱焚嚴霜夜零蕭艾與芝蘭共盡雖游夏
之英才伊顏之殆庶焉能抗之哉其蔽三也或曰明月之珠不能
無類夏后之璜不能無攷故亭伯死於縣長相如卒於園令才非
不傑也主非不明也而碎結緣之鴻輝殘懸黎之夜色抑尺之量
有短哉若然者主父偃公孫弘對策不升第歷說而不入牧豕淄
原見棗州部設令忽如過隙溘死霜露其爲詬恥豈崔馬之流乎
及至開東閣列五鼎電照風行聲馳海外監前愚而後智先非而
終是將榮悴有定數天命有志極而謬生妍蚩其蔽四也夫虎嘯
風馳龍興雲屬故重華立而元凱升辛受生而飛廉進然則天下
善人少惡人多闇主眾明君寡而薰蕕不同器梟鸞不接翼是使
渾敦櫛杙踵武於雲臺之上仲容庭堅耕耘於巖石之下橫謂廢

興在我無繫於天其蔽五也彼戎狄者人面獸心宴安鴆毒以誅
殺爲道德以蒸報爲仁義雖大風立於青丘鑿齒奮於華野比於
狼戾曾何足喻自金行不競天地版蕩左帶沸脣乘間電發遂覆
瀕洛傾五都居先生之桑梓竊名號於中縣與三皇競其萌黎五
帝角其區宇種落繁熾充仞神州嗚呼福善禍淫徒虛言耳豈非
否泰相傾盈縮遞運而沮之以人其蔽六也然所謂命者死生焉
貴賤焉貧富焉治亂焉禍福焉此十者天之所賦也愚智善惡此
四者人之所行也夫神非舜禹心異朱均才絪中庸在於所習是
以素絲無恆玄黃代起鮑魚芳蘭入而自變故季路學於仲尼厲
風霜之節楚穆謀於潘崇成殺逆之禍而商臣之惡盛業光於後
嗣仲山之善不能息其結纓斯則邪正由於人吉凶在乎命或以
鬼神害盈皇天輔德故宋公一言法星三徙殷帝自翦千里來雲
若使善惡無徵未洽斯義且于公高門以待封嚴母掃墓以望喪

此君子所以自強不息也。如使仁而無報，奚爲修善立名乎？斯徑
廷之辭也。夫聖人之言，顯而晦，微而婉，幽遠而難聞，河漢而不測。
梁書作不極或立教以進庸怠，或言命以窮性靈，積善餘慶，立教也。風
鳥不至，言命也。今以其片言，辯其要趣，何異乎夕死之類，而論春
秋之變哉？且荆昭德音，丹雲不卷，周宣祈雨，珪璧斯罄，于叟種德，
不逮勛華之高；延年殘穢，未甚東陵之醜，爲善一爲惡均，而禍福
異其流，廢興殊其迹，蕩蕩上帝，豈如是乎？詩云：風雨如晦，雞鳴不
已。故善人爲善焉有息哉？夫食稻粱，進芻豢，衣狐貉，襲冰紬，觀窈
眇之奇儷，聽雲和之琴瑟，此生人之所急，非有求而爲也。修道德，
習仁義，敦孝悌，立忠貞，漸禮樂之腴潤，蹈先王之盛則，此君子之
所急，非有求而爲也。然則君子居正體道，樂天知命，明其無可奈
何，識其不由智力，逝而不召，來而不距，生而不喜，死而不感，瑤臺
夏屋，不能悅其神，土室編蓬，未足憂其慮，不充詘於富貴，不遑遑

於所欲豈有史公董相不遇之文乎

文選梁書劉峻傳
藝文類聚二十一

廣絕交論

客問主人曰朱公叔絕交論爲是乎爲非乎主人曰客奚此之問
客曰夫草蟲鳴則阜螽躍雕虎嘯而清風起故細縕相感霧涌雲
蒸嚶鳴相召星流電激是以王陽登則貢公喜罕生逝而國子悲
且心同琴瑟言鬱郁於蘭茝道叶膠膝志婉孌於壙篴聖賢以此
鑲金版而鐫盤盂書玉牒而刻鐘鼎若乃匠人輟成風之妙巧伯
子息流波之雅引范張款款於下泉尹班陶陶於永久駱驛縱橫
煙霏雨散巧厯所不知心計莫能測而朱益州汨彝敘粵謨訓極
直切絕交游比黔首以鷹鷂婢人靈於豺虎蒙有猜焉請辨其惑
主人听然而笑曰客所謂撫絃微音未達燥溼變響張羅沮澤不
覩鴻雁雲飛蓋聖人握金鏡開風烈龍驤螻屈從道汗隆日月聯
璧贊疊疊之以致雲飛電薄顯棟華之微旨若五音之變化濟九

成之妙曲。此朱生得玄珠於赤水。謾神睿而爲言。至夫組織仁義。琢磨道德。雖其愉樂。恤其陵夷。寄通靈臺之下。遺迹江湖之上。風雨急而不輟其音。霜雪零而不渝其色。斯則賢達之素交。歷萬古而一遇。逮叔世民譌。狙詐颺起。溪谷不能踰其險。鬼神無以究其變。競毛羽之輕。趨錐刀之末。於是素交盡。利交興。天下蚩蚩。烏鵲雷駭。然則利交同源。派流則異。較言其略。有五術焉。若其寵鉤董石。權壓梁寶。雕刻百工。鑪捶萬物。吐漱興雲雨。呼喻下霜露。九域聳其風塵。四海疊其燦灼。靡不望影星奔。藉響川鶩。雖人始唱。鶴蓋成陰。高門旦開。流水接軫。皆願摩頂至踵。驟膽抽腸。約同要離。焚妻子。誓殉荆卿。湛七族。是曰勢交。其流一也。富埒陶白。貲巨程羅。山擅銅陵。家藏金穴。出平原而聯騎。居里閭而鳴鍾。則有窮巷之賓。繩樞之士。冀宵燭之末光。邀潤屋之微澤。魚貫鳬躍。厥沓鱗萃。分雁鶩之稻粱。霜玉笋之餘瀝。銜恩遇。進款誠。援青松以示心。

指白水而旌信。是曰賄交。其流二也。陸大夫宴喜西都。郭有道人。倫東國公卿貴。其藉甚。摺紳羨其登仙。加以顙頤蹙額。涕唾流沫。騁黃馬之劇談。縱碧雞之雄辯。敘溫郁則寒谷成暄。論嚴苦則春蠶零葉。飛沈出其願指。榮辱定其一言。於是有弱冠王孫。綺紈公子。道不挂於通人。聲未適於雲閣。攀其鱗翼。可其餘論。附騏驎之旌端。軼歸鴻於碣石。是曰談交。其流三也。陽舒陰慘。生民大情。憂合驩離。品物恆性。故魚以泉涸而煦沫。鳥因將死而鳴哀。同病相憐。綴河上之悲曲。恐懼實懷。昭谷風之盛典。斯則斷金由於湫隘。刎頸起於苦蓋。是以伍員濯漑於宰嚭。張王撫翼於陳相。是曰窮交。其流四也。馳驚之俗。澆薄之倫。無不操權衡。秉纖纖。衡所以揣其輕重。纖所以屬其鼻息。若衡不能舉。纖不能飛。雖顏冉龍翰鳳雛。曾史蘭薰雪白。舒向金玉淵海。卿雲黼黻河漢。視若游塵。遇同土梗。莫肯費其半菽。罕有落其一毛。若衡重鎡銖。纖微惡撇。雖共

工之菟懸、雕甍之掩義、南荆之跋扈、東陵之巨猾、皆爲匍匐逶迤、折支舐痔、金膏翠羽、將其意、脂韋便辟、導其誠、故輪蓋所游、必非夷惠之室、苞苴所入、實行張霍之家、謀而後動、毫芒寡忒、是曰量交、其流五也、凡斯五交、義同賈鬻、故桓譚譬之於鬪鬪、林回喻之於甘醴、夫寒暑遞進、盛衰相襲、或前榮而後悴、或始富而終貧、或初存而末亡、或古約而今泰、循環翻覆、迅若波瀾、此則殉利之情、未嘗異、變化之道、不得一、由是觀之、張陳所以凶終、蕭朱所以隙末、斷焉可知矣、而翟公方規、規然勒門、以箴客、何所見之晚乎、因此五交、是生三釁、敗德殄義、禽獸相若、一釁也、難固易攜、讎訟所聚、二釁也、名陷饕餮、貞介所羞、三釁也、古人知三釁之爲梗、懼五交之速尤、故王丹、咸子以橫楚、朱穆、昌言而示絕、有旨哉、有旨哉、近世有樂安、任昉、海內髦傑、早縮銀黃、夙昭民譽、適文麗藻、方駕曹王、英跼俊邁、聯橫許郭、類田文之愛客、同鄭莊之好賢、見一善

則肝衡扼腕遇一才則揚眉抵掌雌黃出其脣吻朱紫由其月旦
於是冠蓋輻湊衣裳雲合輜輳擊鞞坐客恆滿蹈其閭闕若升闕
里之堂入其隩隅謂登龍門之阪至於顧盼增其倍價翦拂使其
長鳴影組雲臺者摩肩趨走丹墀者疊迹莫不締恩狎結綢繆想
莊惠之清塵庶羊左之微烈及冥目東粵歸骸洛浦總帳猶懸門
罕漬酒之彥墳末宿草野絕動輪之賓藐爾諸孤朝不謀夕流離
大海之南寄命嶂嶺之地自昔把臂之英金蘭之友曾無羊舌下
泣之仁靈慕郇成分宅之德嗚呼世路險巇一至於此太行孟門
豈云嶮絕是以耿介之士疾其若斯裂裳裹足棄之長鯨獨立高
山之頂歔與麋鹿同羣噉噉然絕其霧濕誠恥之也誠畏之也

南史五十九藝
文類聚二十一

東陽金華山棲志

夫鳥居山上層巢木末魚潛淵下窟穴泥沙豈好異哉蓋性自然

也故有忽白壁而樂垂綸負玉鼎而要卿相行藏紛糾顯晦踳駁
無異火炎水流圓動方息斯則廟堂之與江海蓬戶之與金閨並
然其所然悅其所悅烏足毛羽瘡痍在其間哉予生自原野善畏
難狎心駭雲臺朱屋望絕高蓋青組且霑濡霧露彌願間逸每思
濯清瀨息椒丘寤寐永懷其來尚矣蜩蜩噬壤民欲天從爰泊二
毛得居巖穴所居東陽郡金華山東陽實會稽西部是生竹箭山
川秀麗皋澤塊鬱若其羣峰疊起則接漢連霞喬林布濩則春青
冬綠迴溪映流則十仞洞底膚寸零合必千里雨散信卓犖爽塏
神居奧宅是以帝鴻遊斯鑄鼎兩師寄此乘烟故澗勒赤松之名
山貽縉雲之號近代江治中奮迅泥滓王徵士高拔風塵龍盤鳳
棲咸萃茲地良由碧端素石可致幽人者哉金華山古馬鞍山也
蘊靈藏聖列名仙謨左元放稱此山云可免洪水五兵可合神丹
九轉金華之皆有紫巖山山色紅紫因此爲稱靡迤坡陀下屬深

渚嶺岷嶷嶺上虧日月登自山麓漸高漸峻壁路迫隘魚貫而升
路側有絕澗開開摩谿俯窺木杪焦原石邑匪獨危懸至山將半
便有廣澤大川泉陸隱脈予之葺宇實在斯焉所居三面皆迴山
周繞有象郭郭南則平野蕭條目極通望東西帶二澗四時飛流
泉清瀾微震滴瀝生響白波跳沫汹涌成音並漕瀆通引交渠綺
錯懸溜瀉於軒薨激湍迴於階砌供帳無綆汲盥漱息瓶盆楓櫨
椅櫪之樹梓柏桂樟之木分形異色千族萬種結朱實包綠裹朽
白蒂抽紫莖櫨矗葦葦梢風鳴籟垂條欄戶布葉房櫳中谷澗濱
華藻攢列至於青春緩謝萍生泉動則有都梁含馥懷香送芬長
樂負霜宜男泣露芙蓉紅華照水皋蘇縹葉從風憑軒永眺獨憂
亡疾丘阿陵曲眾藥灌叢地髓抗莖山筋抽節金甕重於素壁玉
鼓貴於明珠可以養性消痼還年駐色不藉崔文黃散勿用負局
紫丸翱翔羣鳳風胎雨霰綠翼紅毛素纓翠鬣肅肅毛羽關關好

音皆馴狎園池旅食雞鶩若乃鳩日伺辰響類鐘鼓鳴蛇候曙聲
像琴瑟玄猿薄霧清嘯飛猿乘煙永吟嘈噴嘹亮悅心娛耳諒所
以跨躡管籥韜軼笙簧宅東起招提寺背巖面壑層軒引景遶宇
臨崖博敞間虛納祥生白左瞻右睇仁智所居故碩德名僧振錫
雲萃調心七覺詆訶五塵郁列戒香浴滋定水至於熏鑪夜爇法
鼓旦聞予則跼蹐振衣躬行頂禮詢道哲人欽和至教每聞此河
紛梗彼岸永寂熙熙然若登春臺而出宇宙唯善是樂豈伊徒言
寺東南有道觀亭亭崖則下望雲雨蕙樓茵榭隱映林篁飛觀列
軒玲瓏煙霧日止卻粒之氓歲集神仙之客餌星髓吸流霞將乃
雲衣霓裳乘龍馭鶴觀下有石井聳峙中則雕琢刻削頗類人工
躍流激瀉澎湃決咽電擊雷吼駭目驚魂寺觀之前皆植修竹檀
藥蕭瑟被陵緣阜竹外則有良田區畛通接山泉膏液鬱潤肥腴
鄭白決漳莫之能擬致紅粟流溢鳧雁充厭春鶯旨膳碧雞冬蕈

味珍霜鶚，穀巾取於丘嶺。短褐出自中國，簞蔣逼側於池湖。菅蒯
駢填於原隰，養給之資，生生所用，無不阜實。藩籬充牣，崖巘歲始
年季，農隙時間，濁醪初釀，醪清新熟，則田家野老，提壺共至。班荆
林下，陳罇置酌，酒酣耳熱，屢舞誼嗽，盛論箱庾，高談穀稼，嘔噓謳
歌，舉盃相抗，人生樂耳。此歡豈訾？若夫鷺而衣，耕而食，日出而作，
日入而息，晚食當肉，無事爲貴，不求於世，不忤於物，莫辨榮辱，匪
知毀譽，浩蕩天地之間，心無怵惕之警，豈與嵇生齒劍？楊子墜閣，
較其優劣者哉？釋藏經九廣弘明集二十七
又略見藝文類聚三十六

相經序

夫命之與相，猶聲之與響，聲動乎幾，響窮乎應，雖壽夭參差，賢愚
不一，其間大較，可得聞矣。若乃生而神睿，弱而能言，八彩光眉，四
瞳耀目，斯實天姿之特達，聖人之符表。洎乎日偃月角之奇，龍樓
虎踞之美，地靜鎮於城纒，天關運於掌策，金槌玉枕，磊落相望，伏

屏起蓋隱鱗交映井宅既兼食匱已實抑亦帝王卿相之明效也
及其深目長頸頰頰感觸地行鷺立假喙鳥味筋不束體血不華
色手無春莢之柔髮有寒蓬之悴或先吉而後凶或少長乎窮乏
不其悲歟至如姬公凝負圖之容孔父眇棲遑之迹豐本知其有
後黃中明其可貴其間或躍馬膳珍或飛而食肉或早隸晚侯初
形未正銅巖無以飽生玉饌終乎餓死因斯以觀何事非命蘇文類聚

七十
五

自序

蠻中濟濟皆升堂亦有愚者解衣裳

南史四十九

余自比馮敬通而有同之者三異之者四何則敬通雄才冠世志
剛金石余雖不及之而節亮慷慨此一同也敬通值中興明君而
終不試用余逢命世英主亦擯斥當年此二同也敬通有忌妻至
於身操井臼余有悍室亦令家道慙軋此三同也敬通當更始之

世手握兵符躍馬食肉余自少迄長戚戚無懽此一異也敬通有一子仲文官成名立余禍同伯道永無血胤此二異也敬通膂力方剛老而益壯余有大馬之疾溘死無時此三異也敬通雖芝殘蕙焚終填溝壑而爲名賢所慕其風流郁烈芬芳久而彌盛余聲塵寂漠世不吾知魂魄一去將同秋草此四異也所以自力爲敘遺之好事云

梁書劉峻傳

劉歊

歊字士光峻族孫不仕諡曰貞節處士有集八卷

革終論

死生之事聖人罕言之矣孔子曰精氣爲物遊魂爲變知鬼神之情狀與天地相似而不違其言約其旨妙其事隱其意深未可以臆斷難得而精覈聊肆狂瞽請試言之夫形慮合而爲生魂質離而稱死合則起動離則休寂當其動也人皆知其神及其寂也物

莫測其所趣皆知則不言而義顯莫測則逾辯而理微是以勳華
曠而莫陳姬孔抑而不說前達往賢互生異見季札云骨肉歸於
土魂氣無不之莊周云生爲淫役死爲休息尋此二說如或相反
何者氣無不之神有也死爲休息神無也原憲云夏后氏用明器
示民無知也殷人用祭器示人有知也周人兼用之示民疑也攷
之記籍驗之前志有無之辨不可歷言若稽諸內教判乎釋部則
諸子之言可尋三代之禮無越何者神爲生本形爲生具死者神
離此具而卽非彼具也雖死者不可復反而精靈遞變未嘗滅絕
當其離此之日識用廓然故夏后明器示其弗反卽彼之時魂靈
知滅故殷人祭器顯其猶存不存則合乎莊周猶存則同乎季札
各得一隅無傷厥義設其實也則亦無故周人有兼用之禮尼父
發遊魂之唱不其然乎若廢偏攜之論探中途之旨則不仁不智
之譏於是乎可息夫形也者無知之質也神也者有知之性也有

知不獨存依無知以自立故形之於神逆旅之館耳及其死也神去此而適彼也神已去此館何用存速朽得理也神已適彼祭何所祭祭則失理而姬孔之教不然者其有以乎蓋禮樂之興出於澆薄俎豆綴兆生於俗弊施靈筵陳棺槨設饋奠建丘隴蓋欲令孝子有追思之地耳夫何補於已遷之神乎故上古衣之以薪棄之中野可謂尊盧赫胥皇雄炎帝蹈於失理哉是以子羽沈川漢伯方壙文楚黃壤士安麻索此四子者得理也忘教也若從四子而遊則平生之志得矣然積習生常難卒改革一朝肆志儻不見從今欲翦截煩厚務存儉易進不裸尸退異常俗不傷存者之念有合至人之道孔子云斂首足形還葬而無槨斯亦貧者之禮也余何陋焉且張奐止用幅巾王肅唯盥手足范冉殮畢便蓐奚珍南史作無設筵几文度故舟爲惇子廉牛車載柩叔起誠絕墳隴爰珍康成使無卜吉此數公者尙或如之況於吾人而當華泰今欲髣

髣髴景行、以爲軌則、儼合中庸之道、庶免徒費之譏、氣絕不須復魄、南史作復魂、鹽洗而斂、以一千錢市治棺單、故裙衫衣巾枕履、此外送

往之具、棺中常物、及餘閣之祭、一不得有所施、世多信李彭之言、可謂惑矣、余以孔釋爲師、差無此惑、敏訖載以露車、歸於舊山、隨得一地、地足爲塋、塋足容棺、不須塋壁、不勞封樹、勿設祭饗、勿置几筵、無用茅君之虛座、伯夷之杆水、其蒸嘗繼嗣、言象所絕、事止余身、無傷世教、家人長幼、內外姻戚、凡厥友朋、爰及寓所、咸願成余之志、幸勿奪之、梁書劉歊傳

賜進士出身、二品銜廣東等處提刑按察使司按察使兼管驛傳事務黃岡王毓藻校刊

全梁文卷五十七終